

四庫全書

史部

欽定四庫全書

宋史卷一百四十九

元中書右丞相總裁托克托等修

輿服志第一百二

輿服一

五輅

大輅

大輦

芳亭輦

鳳輦

逍遙輦

平輦

七寶輦

小輿

腰輿

耕根車

進賢車

明遠車

羊車

指南車

記里鼓吹

白鷺車

鸞旗車

崇德車

豹尾車

皮軒車
屬車

黃鉞車
五車

涼車

十二神輿

相風鳥輿
征鼓輿

行漏輿
鐘鼓樓輿

昔者聖人作輿軫之方以象地蓋之圓以象天易傳言

黃帝堯舜垂衣裳而天下治蓋取諸乾坤夫輿服之制

取法天地則聖人創物之智別尊卑定上下有大於斯

二者乎舜命禹曰子欲觀古人之象日月星辰山龍華

蟲作會宗彝藻火粉米黼黻絺繡以五采彰施於五色

作服汝明周官之屬有巾車典輅司常有司服司裘內

司服等職以是知輿服始於黃帝成於唐虞歷夏及商而大備於周周衰列國肆為侈汰秦併之擘上選以供服御其次以賜百官始有大駕法駕之制又自天子以至牧守各有鹵簿焉漢興乃不能監古成憲而倣秦所為自是代有變更志有詳略東漢至舊唐書皆稱輿服新唐書改為車服鄭樵合諸代為通志又為器服其文雖殊而攷古制作無以尚於三代矣夫三代制器所以為百世法者以其華質適中也孔子答顏淵為邦之問

曰乘殷之輅服周之冕且禮謂周人上輿而孔子獨取
殷輅是殷之質勝於周也又言禹致美乎黼冕而論冕
以周為貴是周之文勝於夏也蓋已不能無損益於其
間焉不知歷代於秦已還何所損益乎宋之君臣於二
帝三王周公孔子之道講之甚明至其規模制度飾為
聲名已足粲然雖不能盡合古制而於後代庶無愧焉
宋初袞冕綴飾不用珠玉蓋存簡儉之風及為鹵簿又
熾以旗幟華以繡衣褻以毬杖豈非循襲唐五季之習

猶未能盡去其陋邪貽之子孫殆有甚焉者矣迄於徽宗奉身之欲奢蕩靡極雖欲不亡得乎靖康之末累朝法物淪沒於金中興掇拾散逸叅酌時宜務從省約凡服用錦繡皆易以纈以羅旗仗用金銀飾者皆易以繪以髹建炎初有事郊報仗內拂扇當用珠飾高宗曰事天貴質若尚華麗非裡祀本意也是以子孫世守其訓雖江介一隅而華質適時尚足為一代之法其儒臣名物度數之學見諸論議又有可觀者焉今取舊史所載

著於篇作輿服志

五輅宋自神宗以降銳意稽古禮文之事招延儒士折衷同異元豐有詳定禮文所徽宗大觀間有議禮局政和又有禮制局先是元豐雖置局造輅而五輅及副輅多仍唐舊玉輅自唐顯慶中傳之至宋曰顯慶輅親郊則乘之制作精巧行止安重後載太常與闡戟分左右以均輕重世之良工莫能為之其制箱上置平盤黃屋四柱皆油畫刻鏤左青龍右白虎龜文金鳳翅雜花龍

鳳金塗銀裝間以玉飾頂輪三層各施銀耀葉輪衣小帶絡帶並青羅繡雲龍周綴縵帶羅文佩銀穗毬小鈴平盤上布黃褥四角勾闌設圓鑑翟羽虛匱內貼銀鏤香罨軾匱銀龍二銜香囊銀香爐香寶錦帶下有障塵青畫輪轅銀轂乘葉三轅銀龍頭橫木上有銀鳳十二左建青旗十有二旒皆繡升龍右載闌戟繡黻文並青繡網杠又設青繡門簾銀飾梯一拓叉二推竿一銀踏頭銀裝行馬青繒裏輓索駕六青馬馬有金面插鵬羽

輦纓攀胸鈴拂青繡屨錦包尾又誕馬二在輅前飾同

駕馬

餘輅及副輅皆有之

駕士六十四人金輅色以赤駕六赤馬

建大旂駕士六十四人象輅色以淺黃駕六赭白馬建

大赤駕士四十人革輅色以黃駕六駟馬建大白駕士

四十人木輅色以黑駕六黑駟馬建大麾駕士四十人

自金輅而下其制皆同玉輅惟無玉飾五副輅並駕六

馬駕士四十人當用銀飾者皆以銅餘制如正輅政和

三年議禮局更上黃帝車輅之制詔頒行玉輅箱上平

盤黃屋以下皆如舊頂輪三層內一層素輪頂上施金
塗銀山花葉及翟羽青絲繡雲龍絡帶二周綴雜色纓
帶八銅佩八銀穗毬二平盤上布紅羅繡雲龍褥曲几
扶几上下設銀螭首二十四四角勾闌設圓鑑一十六
青羅繡寶相花帶火珠二十八香匱設香爐紅羅繡寶
相花帶香囊香寶銀結綬二紅羅繡雲龍結綬一紅錦
幟龍鳳門簾一青畫輪轅銀轂乘葉軾匱橫轅前轅並
飾以金塗銀螭首橫轅上施銀立鳳一十二左建太常

十有二旒右載闢戟繡黻文杠袴一以青繡杠首飾以銀螭首金塗銅鈸青犂牛尾拂青繒裏索駕青馬六馬有銅面挿鵬羽翬纓攀胸鈴拂青線織屨紅錦包尾又踏路馬二在輅前飾同駕馬凡大祭祀乘之金輅以上並以次列其後若大朝會冊命皇太子諸王大臣則設五輅於大慶殿庭為充庭之儀金輅赤質以金飾諸末建大旂餘同玉輅駕赤馬六凡玉輅之飾以青者金輅以緋象輅淺黃質金塗銅裝以象飾諸末建大赤餘同

玉輅駕赭白六凡玉輅之飾以青者象輅以銀褐革輅黃質輓之以革建太白餘同玉輅駕騶馬六凡玉輅之飾以青者革輅以黃木輅黑質漆之建大麾餘同玉輅駕黑騶六凡玉輅之飾以青者木輅以阜凡玉輅用金塗銀裝者象輅革輅木輅及五副輅並金塗銅裝又禮制局言玉輅馬纓十二而無采不應古制欲以五采屬飾樊纓十有二就輅衡軾並無鸞和乞漆置蓋弓二十有二不應古制乞增為二十八以象星又巾車言玉輅

建太常而不言色司常注云九旗之帛皆用絳以周尚
赤故也禮記月令中央天子乘大輅載黃旂以金象木
革四輅及所建之旂與四時所乘所載皆合今玉輅所
建之旂以青帛十二副連屬為之有升龍而非交龍又
無三乘皆非古制如依成周以所尚之色則用赤依月
令兼四代之制則當用黃仍分繆旂之制及繡畫三辰
於其上今改制太常其旂曳地當依周官以六人維之
又左傳言錫鸞和鈴昭其聲也注錫在馬額鈴在旂首

今旂首無鈴乞增置又車蓋周以流蘇及佩各八無所
法象欲各增為十二以應天數又輅之諸末盡飾以玉
為稱其實而羅紋雜佩乃用塗金乞改為玉又車箱兩
幡有金塗龜文及鷗翅左龍右虎廼後代之制欲改用
繆龍加玉為飾又言既見太常當車之後則自後登車
有妨曲禮言君車將駕則僕執策立於馬前已駕僕展
軛効駕奮衣由右上取貳綏跪乘執策分轡驅之五步
而立君出就車則君升車亦當自右由前而入今玉輅

前有式匱不德百制恐當更革以便登車及改式之制
又禮記言車得其式周官輿人三分其隊一在前二在
後以揉其式以其廣之半為之式崇三分軫圍去一以
為式圍三分軾圍去一以為轡圍注立者為轡橫者為
軾今玉輅無式詔玉輅用青質輪輶絡帶其色如之四
柱平盤虛匱則用赤增蓋弓之數為二十八左右建旂
常並青太常繡日月五星二十八宿旂上則繡以雲龍
朱杠青緇鈴垂十有二就流蘇及佩各增十二之數樊

纓飾以五采之罽衡式之上又加鸞和輅之諸末耀葉
螭頭雲龍垂牙鋌腳花版結綬羅絞雜佩羽臺蔥臺麻
鑣香寶壓貼牌字皆飾以玉自後而升式匱不去既成
高二丈七寸五分濶一丈五尺副玉輅亦用青色舊駕
馬四增為六色亦以青政和四年詔改修正副輅討論
製造金象革木四輅並依新修玉輅制度旂常並建各
與輅一色除去闌戟改車箱兩幡龜文鷗翅左龍右虎
之飾並用蟠龍增蓋弓博山流蘇等數軾衡加和鸞以

合於古金輅朱質飾以金塗銀左右建太常大旂及輪衣絡帶等色皆以黃龍旂九旂如周官金輅建大旂之制駕馬以駟飾樊纓五采九就象輅朱質凡制度裝綴名物並同金輅飾以象及金塗銀銅鍮石左右建太常大赤輪衣絡帶等色皆以紅大赤繡鳥隼七旂如周官象輅建大赤之制駕馬以赤飾樊纓七就革輅朱質凡制度裝綴名物並同金輅飾以金塗銅鍮石左右建太常大白及輪衣絡帶等色皆以淺黃大白繡熊虎六旂

如周官革輅建大白之制駕馬以赭白飾樊纓五就木輅朱質凡制度裝綴名物皆同金輅飾以金塗鍤石左右建太常大麾及輪衣絡帶等色皆以皐大麾繡龜蛇四旂如周官木輅建大麾之制駕馬以烏飾樊纓三就四輅駕馬各六玉輅駕士六十四人餘皆四十人又禮制局增改雅飾諸輅舊副玉輅色青飾以金改用黃而飾以玉樊纓如玉輅之制建太常色黃飾以組象日月於綵星辰於旂其長曳地舊金輅改用青飾以金樊纓

以五采屬而九就建大旂色青飾以組象交龍於繚升
龍於旂其長齊軫象輅改用赤飾以象樊纓以五采屬
而七就建大赤色赤飾以組象鳥隼以繚旂其長齊較
革輅改用白飾以革龍勒條纓建大白色白飾以組象
熊虎於繚旂其長齊肩三輅皆維以縷削幅為之木輅
依舊色而飾以漆其色黑前樊鵠纓建大麾色黑飾以
組象龜蛇於繚旂其長齊首維以縷充幅為之又詔玉
輅身仍用紅太常旂絡帶等用黃餘常旂絡帶亦隨其

輅色高宗渡江鹵簿儀仗悉燬於兵紹興十二年始命工部尚書莫將戶部侍郎張澄等以天禧宣和鹵簿圖考究制度及故內侍工匠省記指說叅酌制度是年九月玉輅成明年遂作金象革木四輅副輅不設玉輅之制青色飾以玉通高十九尺輪高六十三寸輻徑三十寸軸長十五尺三寸頂上剡為輪三層象天圓也外施青玉博山八十一一名耀葉鏤以金塗龍文覆以青羅曰輪衣綴垂玉佩間以五色垂犛尾曰流蘇一名縵帶頂四角

分垂青羅曰絡帶表裏繡雲龍遇雨則油黃繒覆之輅之中四柱象地方也前柱卷龍平槃上布錦褥前有橫軾後垂錦軟簾登車則自後卷簾梯級以登四面周以闌而闕其中以備登降執綏官先自右升立於右柱下以備顧問闌柱頭有玉蹲龍軾前有牌鏤曰玉輅以玉篆之上有玉龍二中設御坐純以黃香木為之取其黃中之正色也下有塗金蹲龍十六在平槃四圍下又有拓角雲龍金米飾之前後左右各二前有轅木三鱗體

昂首龍形轅木上策兩橫竿在前者名曰鳳轅馬負之以行次曰推轅班直推之以助馬力橫於轅後者名曰壓轅以人壓於後欲取其平車輪三歲一易心用榆圜數尺圜以鐵以防折裂橫貫大木以為軸夾以兩輪輪皆彩畫此輅下飾也每新輪成載鐵萬斤試之左建太常右建龍旗插於輅後兩柱之金環前駕青馬六馬有鏤錫鑿纓金鈴紅旄繡屈金包駿錦包尾青繒裹索引之駕士二百三十二人

誕馬十二人左右索百二十八人八轅馬十三人龍頭子二人

前後抱轅各六人推竿四人捧輪四人拓叉四人淨席
四人前攔人員一人後攔人員一人前攔馬八人後攔
馬八人踏道人員二人踏道二十人小拓叉四人小梯
子二人燭臺二人香匙剪子二人左右索人員二人。
又有呵喝人員二人教馬官二人捧輪將軍四人千牛
衛將軍二人推輪軸官建八人抱太常龍旗官六人職
掌五人專知官一人手分一人庫子八人裝柱工匠二
人諸作工匠十五人蓋覆儀鸞司十一人監官三員

金輅黃色飾以金塗銀制如玉輅而高減五寸博山輪
衣絡帶轅輻軸並以黃建大旂九旂駕黃馬六駕士一
百五十四人象輅朱色飾以象及金塗銅制如金輅博
山輪衣絡帶並以朱建大赤七旂駕赤馬六駕士一百

五十四人革輅淺黃白色飾以金塗銅制如象輅博山輪衣絡帶並以淺黃白建大白六旂駕黃白馬六駕士百五十四人木輅黑色飾以金塗銀制如革輅博山輪衣絡帶並以黑建大麾四旂駕黑馬六駕士一百五十四人五輅駕士服色平巾幘青絹抹額纁絹對花鳳袍緋纁絹對花寬袖襖羅袜絹袴襪麻屨其色各從其輅大輅政和六年徐秉哲言南北郊皇帝乘玉輅以赴齋宮自齋宮赴壇正當祀天祭地乃乘大輦疑非禮意下

禮制局討論禮制局請造大輅如玉輅之制唯不飾以玉所駕之馬具數如之唯樊纓一就以稱尚質之義仍建大旂十有二旒龍章日月以協象天之義至禮畢還齋宮則御大輦於禮無嫌從之

大輦周官巾車氏有輦車以人組挽之宮中從容所乘唐制輦有七一曰大鳳輦二曰大芳輦三曰仙遊輦四曰小輕輦五曰芳亭輦六曰大玉輦七曰小玉輦太祖建隆四年翰林學士承旨陶穀為禮儀使創意造為大

輦赤質正方油畫金塗銀葉龍鳳裝其上四面行龍雲
氣火珠方鑑銀絲囊網珠翠結條雲龍鈿窠霞子四角
龍頭銜香囊頂輪施耀葉中有銀蓮花坐龍紅綾裏碧
牙壓帖內設圓鑑銀絲香囊銀飾勾闌臺坐紅絲條網
帡鍤中施黃褥上置御坐扶几香爐錦結綬几衣輪衣
絡帶並緋繡壓金銀綫長竿四銀裹鐵鋤龍頭魚鈎錦
膊褥銀裝畫梯拓义黃羅緣席褥帊梯杖褥朱索緋繒
油帊主輦六十四人親祀南郊謁太廟還及具鸞駕黃

麾仗省方還都則乘之真宗東封以舊輦太重遂命別造凡減七百餘斤後常用焉神宗已後其制赤質正方油畫金塗銀龍鳳裝朱漆天輪一金塗銀頂龍一四面施行龍一十六火珠四四角龍頭四穗毬一十二頂輪施耀葉紅羅輪衣一綴銀鈴紅羅絡帶二中設御坐曲几錦褥等施屏風香爐結綬長竿四飾以金塗銀龍頭祀畢車駕還內若不進輅則乘大輦政和之制黃質冒以黃衣紘以黃帶車箱四圍於程之外高二尺二寸設

軾於前楹軾高三尺二寸建大旂於後楹旂十二旂其
長曳地其色黃繒以交龍素帛為縑繒以日月以弧張
幅以羈韜弧杠以青錦綢之注旄於竿首繫以鈴國朝
之輦有七中興後唯存大輦平輦逍遙三輦而已大輦
又曰大安輦其制赤質正方高十五尺三寸方十一尺
六寸四柱平槃上覆青綠錦上有天輪三層外施金塗
銀博山八十一内有圓鏡金塗銀頂龍一四面行龍十
六火珠四輪衣以青墜以金鈴頂有青羅十字分垂四

角曰絡帶四角出龍首銜犀牛五色尾曰旒綏四面拱
斗外施方鏡九柱圍以朱闌中設御坐曲几屏風錦褥
下舉以長竿四攢竹筋膠丹漆之竿為龍首平槃下四
圍結紅絲網輦官服色武弁黃纁對鳳袍黃絹勒帛紫
生色袒帶紫絹行滕

芳亭輦黑質頂如幕屋緋羅衣裙襴絡帶皆繡雲鳳兩
面朱綠腮花版外施紅絲網綢金銅帔踏前後垂簾下
設牙牀勾闌長竿四銀龍頭銀飾梯行馬主輦一百二

十人政和之制簾以紅羅繡鵝為額內設御坐長竿飾以金塗銅螭首橫竿二

鳳輦亦質頂輪下有二柱緋羅輪衣絡帶門簾皆繡雲鳳頂有金鳳一兩壁刻畫龜文金鳳翅前有軾匱香爐香寶結帶下有勾闌二重內設紅錦褥長竿三銀飾梯行馬主輦八十人法駕鹵簿不設鳳輦

逍遙輦以椶櫚為屋赤質金塗銀裝朱漆扶版二雲版一長竿二飾以金塗銀龍頭常行幸所御又魚鈎帔鍔

梅紅條輦官十二人春夏服緋羅衫秋冬服白獅子錦
襖東封別造辟塵逍遙輦如牕隔黃繒為裏賜名省方
逍遙輦中興之制赤質金塗四柱椽屋上有走脊金龍
四中起火珠凸頂四面不設牕障中有御踏子制甚簡
素祇應人員服帽子宜男方勝襖衫平輦又名平頭輦
亦曰太平輦飾如逍遙輦而無屋輦官十二人服同逍
遙輦常行幸所御東封別造升山天平輦施機關賜名
曰登封輦中興之制赤質正方形如一朱龍倚而加長

竿二飾如逍遙輦而不施樓屋制尤簡素止施畫雲版而已又有七寶輦隆興二年為德壽宮所製也高五十一寸濶二十七寸深三十六寸比附大輦平輦制度為之上施頂輪耀葉角龍頂龍滴子鐸子結穗毬下施梅紅絲裙網加綴七寶中設香木御座引手為轉身龍靠背為龍首靠枰子織以紅黃藤舁以長竿二竿為螭首金塗銀飾焉初有司言東都舊制輦飾以玉裙網用七寶而滴子用珍珠帝曰上皇意不然止欲簡素遂以塗

金易玉梅紅絲結裙網間綴七寶而象牙易真珠既而上皇却不受每至大內多乘馬而間有行幸則用肩輿自是重華壽康兩宮並不別造

小輿赤質頂輪下施曲柄如蓋緋繡輪衣絡帶制如鳳輦而小下有勾欄牙牀繡瀝水中設方牀緋繡羅衣錦褥上有小案坐牀皆繡衣踏牀緋衣前後長竿二銀飾梯行馬奉輿二十四人中輿後去其輪蓋方四十九寸高三十一寸輿上周以勾欄施翟羽玉照子中為方牀

三級上設御坐曲几踏子曲柄緋羅繡蓋輿下紅絲結
五色花裙網舁以長竿二竿為螭首宮殿從容所乘設
鹵簿則陳之

腰輿前後長竿各二金銅螭頭緋繡鳳裙襪上施錦褥
別設小牀緋繡花龍衣奉輿十六人中輿制亦質方形
四面曲闌下結繡裙網制如小輿惟無翟尾玉照子三
級牀曲柄蓋而上設方御床曲几舁竿無螭首用亦同
小輿

耕根車制青質蓋三層餘如五輅之副駕六青馬駕士
四十人親祠具大駕法駕鹵簿並列於仗內若耕籍則
乘之國朝之車自耕根而下凡十有五南渡所存惟耕
根車一而已其制度並同惟駕士七十五人

進賢車古安車也太祖乾德元年改赤質兩辟紗牕擊
耳虛匱一轅緋幘衣絡帶門簾皆繡鳳紅絲網中設朱
漆牀香案紫綾案衣緋繒褱輓索朱漆行馬

凡車皆有輓索行馬

駕四馬駕士二十四人

明遠車古四望車也駕以牛太祖乾德元年改仍舊四馬亦質制如屋重欄勾闌上有金龍四角垂銅鐸上層四面垂簾下層周以花版三轅駕士四十人服繡對鳳羊車古輦車也亦為畫輪車駕以牛隋駕以果下馬今亦駕以二小馬赤質兩辟畫龜文金鳳翅緋憶衣絡帶門簾皆繡瑞羊童子十八人

指南車一曰司南車赤質兩箱畫青龍白虎四面畫花鳥重臺勾闌鏤拱四角垂香囊上有仙人車雖轉而手

常南指一轅鳳首駕四馬駕士舊十八人太宗雍熙四年增為三十人仁宗天聖五年工部郎中燕肅始造指南車肅上奏曰黃帝與蚩尤戰於涿鹿之野蚩尤起大霧軍士不知所向帝遂作指南車周成王時越裳氏重譯來獻使者惑失道周公賜輶車以指南其後法俱亡漢張衡魏馬鈞繼作之屬世亂離其器不存宋武帝平長安嘗為此車而制不精祖沖之亦復造之後魏太武帝使郭善明造彌年不就命扶風馬岳造垂成而為善

明鵠死其法遂絕唐元和中典作官金公立以其車及
記里鼓上之憲宗閱於麟德殿以備法駕歷五代至國
朝不聞得其制者今創意成之其法用獨轆車車箱外
籠上有重構立木仙人於上引臂南指用大小輪九合
齒一百二十足輪二高六尺圍一丈八尺附足立子輪
二徑二尺四寸圍七尺二寸出齒各二十四齒間相去
三寸轆端橫木下立小輪二其徑三寸鐵軸貫之左小
平輪一其徑一尺二寸出齒十二右小平輪一其徑一

尺二寸出齒十二中心太平輪一其徑四尺八寸圍一丈四尺四寸出齒四十八齒間相去三寸中立貫心軸一高八尺徑三寸上刻木為仙人其車行木人指南若折而東推轅右旋附右足子輪順轉十二齒繫右小平輪一匝觸中心太平輪左旋四分之一轉十二齒車東行木人交而南指若折而西推轅左旋附左足子輪隨輪順轉十二齒繫左小平輪一匝觸中心太平輪右轉四分之一轉十二齒車正西行木人交而南指若欲北

行或東或西轉亦如之詔以其法下有司製之大觀元
年內侍省吳德仁又獻指南車記里鼓車之制二車成
其年宗祀大禮始用之其指南車身一丈一尺一寸五
分濶九尺五寸深一丈九寸車輪直徑五尺七寸車轆
一丈五寸車箱上下為兩層中設屏風上安仙人一執
杖左右龜鶴各一童子四各執纓立四角上設闕牀卧
輪一十三各徑一尺八寸五分圍五尺五寸五分出齒
三十二齒間相去一寸八分中心輪軸隨屏風貫下下

有輪一十三中至大平輪其輪徑三尺八寸圍一丈一尺四寸出齒一百齒間相去一寸二分五釐通上左右起落二小平輪各有鐵墜子一皆徑一尺一寸圍三尺三寸出齒一十七齒間相去一寸九分又左右附輪各一徑一尺五寸五分圍四尺六寸五分出齒二十四齒間相去二寸一分左右疊輪各二下輪各徑二尺一寸圍六尺三寸出齒三十二齒間相去二寸一分上輪各徑一尺二寸圍三尺六寸出齒三十二齒間相去一寸

一分左右車腳上各立輪一徑二尺二寸圍六尺六寸
出齒三十二齒間相去二寸二分五釐左右後轆各小
輪一無齒繫竹簾并索在左右軸上遇右轉使右轆小
輪觸落右輪若左轉使左轆小輪觸落左輪行則仙童
交而指南車駕赤馬二銅面插羽鞶纓攀胸鈴拂緋絹
屣錦包尾

記里鼓車一名大章車赤質四面畫花鳥重臺勾闌鏤
拱行一里則上層木人擊鼓十里則次層木人擊鐺一

轅鳳首駕四馬駕士舊十八人太宗雍熙四年增為三十人仁宗天聖五年內侍盧道隆上記里鼓車之制獨轅雙輪箱上為兩重各刻木為人執木槌足輪各徑六尺圍一丈八尺足輪一周而行地三步以古法六尺為步三百步為里用較今法五尺為步三百六十步為里立輪一附於左足徑一尺三寸八分圍四尺一寸四分出齒十八齒間相去二寸三分下平輪一其徑四尺一寸四分圍一丈二尺四寸二分出齒五十四齒間相去

與附立輪同立貫心軸一其上設銅旋風輪一出齒三齒間相去一寸二分中立平輪一其徑四尺圍一丈二尺出齒百齒間相去與旋風等次安小平輪一其徑三寸少半寸圍一尺出齒十齒間相去一寸半上平輪一其徑三尺少半尺圍一丈出齒百齒間相去與小平輪同其中平輪轉一周車行一里下一層木人擊鼓上平輪轉一周車行十里上一層木人擊鐺凡用大小輪八合二百八十五齒遞相鈎鑠犬牙相制周而復始詔以

其法下有司製之大觀之制車箱上下為兩層上安木人二身各手執木槌輪軸其四內左壁車腳上立輪一安在車箱內徑二尺二寸五分圍六尺七寸五分二十齒齒間相去三寸三分五釐又平輪一徑四尺六寸五分圍一丈三尺九寸五分出齒六十齒間相去二寸四分上太平輪一通軸貫上徑三尺八寸圍一丈一尺出齒一百齒間相去一寸二分立軸一徑二寸二分圍六寸六分出齒三齒間相去二寸二分外太平輪軸上有

鐵撥子二又木橫軸上關板撥子各一其車脚轉一百
遭通輪軸轉周木人各二擊鉦鼓

白鷺車隋所制也一名鼓吹車赤質周施花版上有朱
柱貫五輪相重輪衣以緋阜頂及緋絡帶並繡飛鷺柱
杪刻木為鷺銜鵝毛筩紅綬帶一轅駕四馬駕士十八
人

鸞旗車漢制為前驅赤質曲壁一轅上載赤旗繡鸞鳥
駕四馬駕士十八人

崇德車本秦辟惡車也上有桃弧棘矢所以禳却不祥
太祖乾德元年改赤質周施花版四角刻辟惡獸中載
黃旗赤繡此獸太卜署令一人在車中執旗駕四馬駕
士十八人政和之制建黃羅繡崇德旗一彩畫刻木獅
旁四宣和元年禮制局言崇德車載太卜令一員畫辟
惡獸於旗記曰前巫而後史傳曰桃弧棘矢以供禦王
事請以巫易太卜弧矢易辟惡獸從之

皮軒車漢前驅車也冒以虎皮為軒取曲禮前有士師

則載虎皮之義赤質曲壁上有柱貫五輪相重畫虎文
駕四馬駕士十八人政和之制用漆柱貫朱漆皮軒五
黃鉞車漢制乘輿建之在太駕後晉鹵簿有黃鉞車唐
初無之貞觀後始加赤質曲壁中設金鉞一錦囊綢杠
左武衛隊正一人在軍中執鉞駕兩馬駕士十五人
豹尾車古者軍正建豹尾漢制最後車一乘垂豹尾豹
尾以前即同禁中唐貞觀後始加此車於鹵簿內制同
黃鉞車上載朱漆竿首綴豹尾右武衛隊正一人執之

駕兩馬駕士十五人

屬車一曰副車一曰貳車一曰左車秦制大駕屬車八十一乘法駕三十六乘漢法駕用三十一乘小駕用十二乘隋制大駕三十六法駕十二小駕不用唐大駕唯三十二乘宋因之黑質兩箱輦裝前有曲闌金銅飾上施紫通憶絡帶門簾皆繡雲鶴紫絲網幘鍔每乘駕二牛駕士十人

五車徽宗宣和元年禮制局言舊鹵簿記有白鷺鸞旗

皮軒三車其制非古按曲禮曰前有水則載青旌前有塵埃則載鳴鳶前有車騎則載飛鴻前有士師則載虎皮前有鵩獸則載貔貅萬乘一出五車必載所以警衆也青旌鳴鳶飛鴻貔貅乃以白鷺鷥旗雜陳其間未為合禮今欲改五車相次於中道繼之以崇德車於是為備青旌車赤質曲壁中載青旌以絳帛為之畫青鳥於其上鳴鳶車赤質曲壁中載鳴鳶旌以絳帛為之畫鳴鳶於其上飛鴻車赤質曲壁中載飛鴻旌以絳帛為之

畫飛鴻於其上虎皮車赤質曲壁中載虎皮旌以絳帛
為之緣以赤畫虎皮於上獵獬車赤質曲壁旌以絳帛
為之緣以赤畫獵獬於上其轅皆一

涼車赤質金塗銀裝龍鳳五采明金織以紅黃藤油壁
緋絲條龍頭梅紅羅褥銀螭頭穗毬雲朵踏頭蓮花坐
鴈鈎火珠門沓鋸鉞頻伽大小鑠駕以橐駝省方在道
及校獵廻則乘之

相風烏輿上載長竿竿杪刻木為烏垂鵝毛簫紅綬帶

下承以小盤周緋裙繡烏形輿士四人

行漏輿隋大業行漏車也制同鐘鼓樓而大設刻漏如
稱衡首垂銅鉢末有銅象漆匱貯水渴烏注水入鉢中
長竿四輿士六十人

十二神輿赤質四門旁刻十二辰神緋繡輪衣絡帶輿
士十二人

交龍鉦鼓輿各一皆刻木為二青龍相交下有木臺長
竿一掛畫鼓一掛金鉦上皆有緋蓋亦繡交龍輿士各

二人中興後相風行漏十二神鉦鼓四興悉省去

鐘鼓樓興各一本隋大駕鐘車鼓車也皆刻木為屋中
置鐘鼓下施木臺長竿如鉦鼓興與士各二十四人行
漏興十二神興交龍鉦鼓興鐘鼓樓舊禮無文皆太祖
開寶定禮所增

宋史卷一百四十九

欽定四庫全書

史部

宋史卷一百

五十三

詳校官編修臣卹庭澹

洗馬臣王坦修覆勘

覆校官編修臣沈清藻

校對官監丞臣侍朝

謄錄監生臣姜今熙

欽定四庫全書

宋史卷一百五十

元中書右丞相總裁托克托等修

輿服志第一百三

輿服二

后妃車輿
綴扇鞍勒

皇太子王公以下車輿
門戟旌節

皇后之車唐制六等一曰重翟二曰厭翟三曰翟車四
曰安車五曰四望車六曰金根車宋因之初用厭翟車

其制箱上有平盤四角曲闌盤兩壁紗牕龜文金鳳翅
前有虛匱香爐香寶緋繡幘衣絡帶門簾三轅鳳首畫
梯推竿行馬緋繒裹索駕六馬金銅面纓轡鈴攀緋屣
駕士三十人武弁緋繡衫常出止用正副金塗銀裝白
藤輿各一上覆梭欄屋飾以鳳輦官服同乘輿平頭輦
之制徽宗政和三年議禮局上皇后車輿之制重翟車
青質金飾諸末間以五采輪金根朱牙具箱飾以重翟
羽四面施雲鳳孔雀刻鏤龜文頂輪上施金立鳳耀葉

青羅憶衣一紫羅畫雲龍絡帶二青絲絡網二紫羅畫
帷一青羅畫雲龍夾幔二車內設紅褥及坐橫轅上施
立鳳八香匱設香爐香寶香匱飾以螭首前後施簾長
轅三飾以鳳頭青繒褰索駕青馬六馬有銅面插翟羽
鞶纓攀胸鈴拂青屨青包尾若受冊謁景靈宮則乘之
厭翟車赤質其箱飾以次翟羽紫憶衣紅絲絡網紅羅
畫絡帶夾幔錦帷餘如重翟車駕赤騮四若親蠶則乘
之翟車黃質其車側飾以翟羽黃憶衣黃絲絡網錦帷

絡帶餘如重翟車駕黃騮四安車赤質金飾間以五采
刻鏤龜文紫幘衣錦帷絡帶紅絲絡網前後施簾車內
設褥及坐長轅三飾以鳳頭駕赤騮四凡駕馬輦纓之
飾並從車質四望車朱質青幘衣餘同安車駕牛三金
根車朱質紫幘衣餘同安車駕牛三自重翟車以下備
鹵簿則皆以次陳設藤輿金塗銀裝上覆椶櫚屋以龍
飾常行之儀則用之

龍肩輿一名椶檐子一名龍檐子舁以二竿故名檐子

南渡後所製也東都皇后備厭翟車常乘則白藤輿中
興以太后用龍輿后惟用檐子示有所尊也其制方質
椽頂施走脊龍四走脊雲子六朱漆紅黃藤織百花龍
為障緋門簾看牕簾朱漆藤坐椅踏子紅羅裯褥軟屏
夾幔隆興二年正月皇后受冊畢擇日朝謁有司具儀
物乞乘肩輿龍檐製造所受給使臣尹肇發納中宮金
塗銀葉椽欄朱漆紅黃藤織百花龍杵子碌牙壓貼鏤
金雕木腰花泥版龍檐子一乘金塗銀頂子龍頭六走

脊龍四走脊雲子六貼絡龍四十貼絡雲子三十鐸子
八插拴坐龍四環索金鈹遮那一副檀香龜背紅紗牕
四扇紅羅緣紅簾門簾一瀝水全看牕簾二朱漆藤面
明金雕木龍頭椅一脚踏一紅線條結一朱漆小几二
紅羅褥全紅羅緣肩膊席褥一十六繫帶全金塗銀鐵
胎杆鞦四魚鈎四火踏一朱漆梯盤全朱漆衣匣二金
塗銅手把葉段拓义二金塗銅义頭拖泥行馬二金塗
銀葉杠子二紅茸匾條四紅羅夾軟屏風夾幔各一櫬

脚席褥靠背坐褥及踏床各一紅帽十字帕一竿袋四魚鈎帕二紅油十字帕竿袋魚鈎帕數同上兜地帕一圍裙一大安輦真宗咸平中為萬安太后製輿上設行龍六乾興元年詔皇太后御坐檐子名大安輦神宗嗣位尊皇太后為太皇太后其行幸依治平元年之制而皇太后皇后常出止用副金塗銀裝白藤輿覆以椶櫚屋飾以鳳輦官服同乘輿平頭輦之制於是詔太皇太后出入所乘如萬安太后輿上設行龍六制飾率有加

金銅車禮典不載則如舊制
哲宗紹聖元年議造皇太后
大安車中書具治平元豐中
皇太后輿服儀衛以呈
曰元豐中先帝手詔皇太后
行幸儀衛並依慈聖光獻
太皇太后日例而宣仁謙恭
不乘大安輦哲宗曰今皇
太后獨尊非宣仁比遂詔行
幸進大安輦已而皇太后
嫌避竟不製造

龍輿皇太后所乘也東都皇
太后多垂簾皆抑損遠嫌
不肯乘輦止用輿而已
哲宗既嗣位尊朱貴妃為皇太

妃出入許乘檐子有司請用牙魚鳳為飾繖用青元祐三年太皇太后詔有司尋繹典故於是檐子飾以龍鳳繖用紅九年羣臣議改檐子為輿上設行龍五出入由宣德東偏門括宗以皇太后諭旨令太妃坐六龍輿出入進黃繖由宣德正門於是三省議皇太妃坐龍鳳輿繖紅黃兼用從皇太后出入止用紅紹聖元年禮部太常寺言近奉旨皇太后欲令皇太妃坐六龍輿朕常思皇太妃尊奉之禮既不敢擬隆於皇太后又不可不逮

於中宮今參以人情再加詳定伏請供進龍鳳輿從之
及徽宗即位尊太妃為聖瑞皇太妃詔儀物除六龍輿
不用仍進龍鳳輿外餘悉增崇焉紹興奉迎皇太后詔
造龍輿其制朱質正方金塗銀飾四竿竿頭螭首赭牕
紅簾上覆以椶加走六龍內設黃花羅帳裍褥朱椅踏
子紅羅繡巾二

皇太子車輅之制唐制三等一曰金輅二曰軺車三曰
四望車太宗至道初真宗為皇太子謁太廟乘金輅常

朝則乘馬真宗天禧中仁宗為皇太子亦同此制徽宗
政和三年議禮局上皇太子車輅之制金輅赤質金飾
諸末重較箱畫莖文鳥獸黃屋伏鹿軾龍輶金鳳一在
軾前設障塵朱蓋黃裏輪畫朱牙左建旂九旒右載闌
戟旗首金龍頭銜結綬及鈴綬八鸞在衡二鈴在軾駕
赤騮四金錢方釤插翟尾鏤錫鞶纓九就從祀謁太廟
納妃則供之輶車金飾諸末紫油通幃紫油纁朱裏駕
馬一四望車金飾諸末清油通幃清油纁朱裏朱絲絡

網駕馬一輅車四望車以次列於鹵簿仗內皇太子妃則有厭翟車駕以三馬出入亦乘檐子中興簡儉惟用藤檐子頂梁舁杠皆飾以黑漆四角刻獸形素藤織花為面如政和之制親王羣臣車輅之制唐制有四一曰象輅親王及一品乘之二曰革輅二品三品乘之三曰木輅四品乘之四曰輅車五品乘之宋親王一品二品奉使及葬並給革輅制同乘輿之副惟改龍飾為螭六引內三品以上乘革車赤質制如進賢車無綦駕四赤

馬駕士二十五人其緋憶衣絡帶旗戟綢杠繡文司徒
以瑞馬京牧以隼御史大夫以獬豸兵部尚書以虎太
常卿以鳳駕士衣亦同縣令乘軺車車質兩壁紗牕一
轅金銅飾紫憶衣絡帶並繡雉銜瑞草駕二馬駕士十
八人百官常朝皆乘馬真宗大中祥符三年知樞密院
事王欽若言王公車輅上並用龍裝乞下有司檢定制
度詔下太常禮院詳定本院言按鹵簿令王公已下象
輅以象飾諸末朱班輪八鸞在衡左建旂畫龍一升一

降右載闔戟革輅以革飾諸末左建旃餘同象輅木輅以漆塗之餘同革輅輶車曲壁青憶碧裏朱輅皆朱質朱蓋朱旂旃一品九旒二品八旒三品七旒四品六旒其輦纓如之神宗元豐三年詳定禮文所言鹵簿記公卿奉引第一開封令乘輶車次開封牧隼旗次太常卿鳳旗次司徒瑞馬旗次御史大夫獬豸旗次兵部尚書虎旗而乘革車考之非是謹按周禮巾車職曰孤乘夏篆卿乘夏縵大夫乘墨車司常職曰孤卿建旃大夫建

物請公卿已下奉引先開封令乘墨車建物次開封牧
乘墨車建旗太常卿御史大夫兵部尚書乘夏縵司徒
乘夏篆並建旃所以參備九旗之制詔從之政和議禮
局上王公以下車制象輅以象飾諸末朱班輪八鸞在
衡左建旗右載闌戟駕馬四親王昏則用之革車赤質
載闌戟緋羅繡輪衣簾旗韜杠絡帶駕赤馬四大駕鹵
簿六引法駕鹵簿三引開封牧第乘之王公一品二品
三品備鹵簿皆供革車一乘其輪衣簾旗韜杠絡帶繡

文開封牧以隼大司樂以鳳少傅以瑞馬御史大夫以
獬豸兵部尚書以虎輅車黑質紫幘衣絡帶並繡雉施
紅錦簾香爐香寶結帶駕赤馬二鹵簿內第一引官縣
令乘之駕馬皆有銅面插羽鞞纓攀胸鈴拂緋絹屨紅
錦包尾六年禮制局言大觀中用大司樂代太常卿為
第三引蓋以大司樂掌鼓吹之事夫禮樂之官宗伯為
長宜改用禮部尚書又第四引司徒即用地官之長自
漢以來為三公朝廷近改司徒為少傅然六引司徒乃

地官之事宜改用戶部尚書其府佐依六引諸卿例改
為僚佐其鹵簿儀仗依兵部尚書例給古之諸侯出封
於外同姓錫以金輅異姓錫以象輅盖出而制節則遠
君而其道伸入而謹度則近君而其勢屈故其入覲則
不敢乘金輅象輅以同於王當自降而乘墨車也若公
侯采地在天子縣內者則為都鄙之長大司馬所謂師
都建旃是矣今開封牧列職於朝與御史大夫同謂之
卿可也其在周官則卿大夫之職是矣又無金輅象輅

之錫而乃比於古之諸侯入覲而乘墨車可乎成周上
公九命車旗以九為節故建常九旂侯伯七命車旗以
七為節故建常七旂子男五命車旗以五為節故建常
五旂其卿六命其大夫四命車旗亦各眡其命之數則
卿之建旂當用六旂大夫建物當用四旂至於三旂則
上士所建也其開封令宜乘墨車而建物四旂開封牧
御史大夫戶部兵部禮部尚書皆卿也宜乘夏縵而建
旂六旂其年詳定官蔡攸又言六引開封令乘輅車居

前開封牧大司樂司徒御史大夫兵部尚書乘革車次
之開封牧建繡隼旗太常卿建繡鳳旗司徒繡瑞馬旗
御史大夫繡以獬豸兵部尚書繡以虎皆副之以闌戟
其先後之序所乘之車所建之旗揆古則不合驗今則
有戾且大駕之出自漢光武時始有三引先河南尹次
執金吾次洛陽令先尊而後卑也後魏亦三引先平城
令次司隸校尉次丞相先卑而後尊也唐兼用六引五
代減為三後周復增為六本朝因之以開封令居前終

以兵部尚書然以前為尊則大司樂不當次令牧以後為尊則兵部尚書不當繼御史大夫此先後之序未正也輅車非縣令宜駕革車非公卿宜用是所乘之車未稱也鳳馬之繡無所經見闢戟之設尤為訛謬是所建之旗未宜也司徒三公論道之官車徒非其所任戶部主之可也奉常掌禮司樂典樂皆專於一事禮樂之容非其所兼禮部總之宜也請改司徒用戶部尚書改大司樂用禮部尚書其僚佐儀制視兵部尚書御史大夫

位亞三少秩從二品又尊於六尚書其行宜以兵部次
令牧禮部戶部又次之終以御史大夫則先後之序正
矣夏篆者篆其車而五采畫之也夏縵則五采畫之而
不篆墨車則漆之而不畫孤宜乘夏篆象其文質之備
卿宜乘夏縵象其文采而不足於篆開封令秩比大夫
開封令古之諸侯其乘皆宜墨車其駕之馬令以三牧
以四御史大夫以四尚書卿之任也其駕亦四則所乘
之車稱矣司常曰孤卿建旃大夫士建物師都建旗蓋

通帛為旃其色純赤雜帛為物其色赤白物為三旂旃亦如之開封令秩視大夫故宜建以物開封牧率王畿之衆而衛上師都之任也故宜建以旗尚書御史大夫古之卿也故宜建以旃從之七年禮制局言昨討論大駕六引開封牧乘墨車兵部尚書禮部尚書戶部尚書御史大夫乘夏縵已經冬祀陳設訖所有駕士衣服尚循舊六引之制宜行改正況天子五輅駕士之服各隨其輅之色則六引駕士之服當亦如之請墨車駕士衣

皂夏縵駕士皂質五色團花於禮為稱從之

肩輿神宗優待宗室老疾不能騎者出入聽肩輿熙寧五年太宗正司請宗室以病肩輿者踏引籠燭不得過兩對中興後人臣無乘車之制從祀則以馬常朝則以轎舊制輿檐有禁中興東征西伐以道路阻險詔許百官乘轎王公以下通乘之其制正方飾有黃黑二等凸蓋無梁以蔑席為障左右設牖前施簾舁以長竿二名曰竹轎子亦曰竹輿

內外命婦之車唐制有厭翟車翟車安車白銅飾犢車而幘網有降差宋制銀裝白藤輿檐內命婦皇親所乘白藤輿檐金銅犢車漆犢車或覆以氈或覆以椶內外命婦通乘

織人臣通用以青絹為之宋初京城內獨親王得用太宗太平興國中宰相樞密使始用之其後近臣及內命婦出外皆用真宗大中祥符五年詔除宗室外其餘悉禁明年復許中書樞密院用焉京城外則庶官通用神

宗熙寧之制非品官禁用青蓋京城惟執政官及宗室
許用括宗紹聖三年詔在京官不得用涼扇徽宗政和
三年以燕越二王出入百官不避乃賜三接青羅繖一
紫羅大掌扇二塗金花鞍韉茶燎等物皆用塗金遂為
故事八年詔民庶享神不得造紅黃繖扇及彩繪以為
祀神之物宣和初又詔諸路奉天神許用紅黃繖扇餘
祠廟並禁其畫壁塑像儀仗用龍飾者易之建炎中初
駐蹕杭州執政張澄言羣臣扈從兵間權免張蓋俟回

鑾仍舊詔前宰相到闕許張益鞞勒之制宋以賜羣臣
其非賜者皆有令式而不敢踰越焉金塗銀闌裝牡丹
花校具八十兩紫羅繡寶相花雉子方韉油畫鞍白銀
銜鐙以賜宰相親王樞密使帶使相曾任宰相觀文殿
大學士宮觀使殿前馬軍步軍都指揮使金塗銀闌裝
太平花校具七十兩紫羅繡瑞草方韉油畫鞍陷銀銜
鐙以賜使相樞密副使參知政事宣徽使節度使宮觀
使殿前馬軍步軍副都指揮使都虞候

四箱都指揮使
韉以紫羅刺花

若出使則加紅犀牛纓金塗銀鈸使相在外加紅織成

鞍複

步軍都虞侯以上賜帶甲馬者加紅皮鞞校具七十兩青氈圓鞞陷銀銜鐙

金塗銀鬧

裝麻葉校具五十兩紫羅刻花方鞞油畫鞍陷銀銜鐙

以賜三司使觀文殿學士資政殿大學士翰林學士承

旨翰林學士資政殿端明殿翰林侍讀侍講龍圖天章

寶文閣樞密直學士御史中丞兩使留後觀察防禦使

軍廂都指揮使

軍廂都指揮使初出授團練使刺史者賜亦同曾任中書樞密院後為學士中

丞者七十兩鶻以繡瑞草

見任中書樞密院宣徽使使相節度使出

使曾任中書樞密院充諸路都總管安撫使朝辭日賜亦如之金塗銀三環寶相花校具二十五兩紫羅圓鞵烏漆鞍銜鐙以賜團練使刺史金塗銀促結洛州花校具三十兩紫羅圓鞵以賜諸路承受白成十五兩以賜諸王宮僚翰林侍讀侍書金塗銀寶相花校具四十兩蠻雲校具十五兩以賜諸班押班殿前指揮使以上白成窪面校具十二兩以賜諸班皆藍黃絕圓鞵具皇親婚嫁皆給藍黃羅繡方鞵金塗銀花鞍金塗銀校具自

八十兩至十二兩有六等宗室女婚繫親皆賜紫羅繡
瑞草方韉校具自七十兩至五十兩有二等其賜契丹
使則金塗銀太平花校具七十兩紫羅繡寶相花雉子
方韉副使則槲葉校具五十兩紫羅繡合子地圓韉皆
油畫鞍射弓則使銀裝副使銀稜賜諸蕃進奉大使則如刺史而用

青條韉副使則如宮僚凡京官三品以上外任者皆許
馬以纓飾太宗太平興國七年翰林學士承旨李昉言
準詔詳定車服制度請升朝官許乘銀裝條子鞍勒六

品以下不得開裝其鞵皆不得刺繡金皮飾餘官及工商庶人許並乘烏漆素鞍不得用狔毛暖坐其藍黃條子非宮禁不得乘士庶軍校乘白皮鞵勒者悉禁斷從之八年詔京朝知錄事參軍及知縣者所乘馬並不得飾纓後復許帶纓端拱二年詔內職諸班押班禁軍指揮使廂軍都虞侯並許乘銀裝條子鞍勒京官任知州通判許依六品朝官真宗咸平二年西京留臺上言留府羣官使臣乘馬不得帶纓從之大中祥符五年詔繡

韉及闊裝校具除宗室及恩賜外悉禁天禧元年令兩
省諫舍宗室將軍以上許乘狔毛暖坐餘悉禁凡京官
三班已上外任者皆許馬以纓飾仁宗景祐三年詔官
非五品以上毋得乘闊裝銀鞍其乘金塗銀裝條子促
結鞍轡者自文武升朝官及內職禁軍指揮使諸班押
班廂軍都虞候防團副使以上聽之仍毋得以藍黃為
條白皮為韉轡民庶止許以羶皮絕紬為韉京官為通
判以上職任者許權依升朝例神宗熙寧間文武升朝

官禁軍都指揮使以上塗金銀裝盤條促結五品以上復許銀鞍鬧裝若開花繡韉惟恩賜乃得乘餘官及民庶仍禁銀飾舊制諸王視宰相用繡鞍韉政和三年始賜金花鞍韉諸王不施狨坐宣和末始賜中興因之乾道九年重修儀制權侍郎大中大夫以上及學士待制經恩賜許乘狨坐三衙節度使曾任執政官亦如之先是建炎初駐蹕杭州詔扈從臣僚合設狨坐者權宜撤去故事宰就侍從自八月朔搭坐紹興元年以江浙地

燠改為九月朔著為例乾道元年乃詔三衙乘馬賜狨坐

門戟木為之而無刃門設架而列之謂之榮戟天子宫殿門左右各十二應天數也宗廟門亦如之國學文宣王廟武成王廟亦賜焉惟武成王廟左右各八臣下則諸州公門設焉私門則府第恩賜者許之太宗淳化二年詔諸道州府軍監奏乞鼓角戟稍如令文合賜即下三司指揮仁宗天聖四年太常禮院言準批狀詳定知

廣安軍范宗古奏本軍乞降稍檢曾令文京兆河南太原府大都督府都護門十四戟若中都督上都護門十二戟下都督諸州門各十戟並官給所有軍監門不載伏請不行神宗元豐之制凡門列戟者官司則開封河南應天大名大都督府皆十四中都督皆十二下都督皆十品官恩賜者正一品十六二品以上十四中興仍舊制

旌節唐天寶中置節度使受命日賜之得以專制軍事

行即建節府樹六纛宋凡命節度使有司給門旗二龍
虎各一旌一節一麾槍二豹尾二旗以紅繒九幅上設
耀莛鐵鑽髹杠緋纛旌用塗金銅螭頭髹杠綢以紅繒
畫白虎頂設髹木盤周用塗金飾節亦用髹杠飾以金
塗銅葉上設髹圓盤三層以紅綠裝釘為旄並綢以紫
綾複囊又加碧油絹袋麾槍設髹木盤綢以紫繒複囊
又加碧油絹袋豹尾製以赤黃布畫豹文並髹杠神宗
熙寧五年詔新建節并移鎮並降敕太常侍排比旌節

下左右金吾街仗司驂驪院給執擎人員鞍馬中興因
之建炎三年表韓世忠之旗曰忠勇紹興三年表岳飛
之旗曰精忠孝宗詔以其藩邸旌節迎置天章閣淳熙
中光宗亦詔奉東宮旌節其後寧宗踐祚有司言安奉
皇帝藩邸旌節宜有推飾今用朱漆青地金字牌二其
一題曰太上皇帝藩邸旌節其一曰今上皇帝藩邸旌
節蓋襲用元豐延安故事云

宋史卷一百五十

宋史卷一百五十考證

輿服志二金塗銀鐵胎杆鞫四○本志大輦長竿四銀
裏鐵鍋與通考同此鞫字應是鍋字之訛

金塗銅手把葉段拓义二金塗銅义頭拖泥行馬二○
二义字監本訛又從通考改正

宋史卷一百五十考證

欽定四庫全書

宋史卷一百五十一

元中書右丞相總裁托克托等脩

輿服志第一百四

輿服三

天子之服皇太子附
后妃之服命婦附

天子之服一曰大裘冕二曰袞冕三曰通天冠絳紗袍
四曰履袍五曰衫袍六曰窄袍天子祀享朝會親耕及
視事燕居之服也七曰御閱服天子之戎服也中興之

後則有之

大裘之制神宗元豐四年詳定郊廟奉祀禮文所言周禮司裘掌為大裘以供王祀天之服司服王祀昊天上帝則服大裘而冕祀五帝亦如之享先王則衮冕而禮記云郊祭之日王被衮以象天戴冕璪十有二旒則天數也王肅據家語以為臨燔柴脫衮冕著大裘則是禮記被衮與周禮大裘郊祀並用二服事不相戾但服之有先後耳是以開寶通禮皇帝服衮冕出赴行宮祀日

服袞冕至大次質明改服大裘而冕出次蓋袞冕盛服而文之備者故於郊之前期被之以至大次既臨燔柴則脫袞冕服裘以明天道至質故被裘以體之今儀注車駕赴青城服通天冠絳紗袍祀之日乃服韡袍至大次服袞冕臨祭非尚質之義乞並依開寶通禮詔詳定所參議又言臣等詳大裘之制本以尚質而後世反以尚文故冕之飾大為不經而禮書所載上有垂旒加飾又異大裘不裼之說今參考諸說大裘冕無旒廣八寸

長一尺六寸前圓後方前低寸二分玄表朱裏以繒為之玉筭以朱組為紃玉璜以玄紃垂之為裘以黑羔皮領袖以黑繒纁裳朱紱而無章飾佩白玉玄組綬草帶博二寸玉鈎釧以佩紱屬之素帶朱裏絳純其外上朱下綠白紗中單皂領青標襪裾朱鞞赤舄黑絢纁純乞下所屬製造其當暑奉祠之服乞降梁陸瑋議以黑繒為裘及唐輿服志以黑羔皮為緣詔重詳定光祿寺丞集賢校理陸佃言臣詳冕服有六周官弁師云掌王之

五冕則大裘與袞同冕故禮記云郊之日王被袞以象
天又曰服之襲也充義也禮不盛服不充故大裘不裼
此明王服大裘以袞衣襲之也先儒或謂周祀天地皆
服大裘而大裘之冕無旒非是蓋古者裘不徒服其上
必皆有衣故曰緇衣羔裘黃衣狐裘素衣麤裘如郊祀
徒服大裘則是表裘以見天地表裘不入公門而乃欲
以見天地可乎且先王之服冬裘夏葛以適寒暑未有
能易之者也郊祀天地有裘無袞則夏祀赤帝與至日

祭地祇亦將被裘乎然則王者冬祀昊天上帝中裘而表衮明矣至於夏祀天神地祇則去裘服衮以順時序周官曰凡四時之祭祀以宜服之明夏不必衣裘也或曰祭天尚質故徒服大裘被衮則非尚質臣以為尚質者明有所尚而已不皆用質也今欲冬至禋祀昊天上帝服裘被衮其餘祀天及祀地祇並請服衮去裘各以其宜服之於是詳定所言裘不可徒服禮記曰大裘不裼則襲可知所謂大裘之襲者衮也與衮同冕伏請冬

祀昊天與黑帝皆服大裘被以衾其餘非冬祀天及夏至祭地則皆服衮六年尚書禮部言經有大裘而無其制近世所為惟梁隋唐為可考請緣隋制以黑羔皮為裘黑繒為領袖及裏緣袂廣可運肘長可蔽膝按皇侃說祭服之下有袍繭袍繭之下有中衣朝服裼衣之下有裘裘之下有中衣然則今之視郊中單當在大裘之下其袂之廣狹衣之長短皆當如裘伏乞改制於是神宗始服大裘而加衮冕焉哲宗元祐元年禮部言元豐所造

大裘須用黑羔皮乃作短袍樣襲於衮衣之下仍與衮服同冕未合典禮下禮部太常寺共議上官均吳安詩常安民劉唐老龔原姚勔請依元豐新禮丁鴈請循祖宗故事王愈請倣唐制朱光庭周秩請以玄衣襲裘獨禮部員外郎何洵直在元豐中嘗預詳定以陸佃所議有可疑者八按周禮節服氏掌祭祀朝覲衮冕六人惟王之太常郊祀裘冕二人既云衮冕又云裘冕是衮與裘各有冕乃云裘與衮同冕當以衮襲之裘既無冕又

襲於袞中裘而表袞何以示裘袞之別哉古人雖質不應以裘為夏服蓋冬用大裘當暑則以同色繒為之記曰郊祭之日王被袞以象天若謂裘上被袞以被為襲則家語亦有被裘象天之文諸儒或言臨燔柴脫袞冕著大裘或云脫裘服袞蓋裘袞無同冕兼服之理今乃以二服合為一可乎且大裘天子吉服之最上若大圭大路之比是裘之在表者記曰大裘不裼說者曰無別衣以裼之蓋他服之裘褻故表裘不入公門事天以報

本復始故露質見素不為表襮而冕亦無旒何必假他衣以藩飾之乎凡表上有衣謂之裼裼上有衣謂之襲襲者表上重二衣也大表本不裼鄭志乃云表上有玄衣與表同色蓋趙商之徒附會為說不與經合襲之為義本出於重沓非一衣也古者齋祭異冠齋服降祭服一等祀昊天上帝五帝以表冕祭則衮冕齋故鄭氏云王齋服衮冕是衮冕者祀天之齋服也唐開元及開寶禮始以衮冕為齋服表冕為祭服兼與張融臨燔柴脫

衮服裘之義合請從唐制兼改製大裘以黑繒為之佃
復破其說曰夫大裘而冕謂之裘冕非大裘而冕謂之
衮冕則裘冕必服衮冕不必服裘今特言裘冕者主
冬至言之周禮司裘掌為大裘以供王祀天之服則祀
地不服大裘以夏日至不可服裘故也今謂大裘當暑
以同色繒為之尤不經見兼襦襲一衣而已初無重沓
之義被裘而覆之則曰襲袒而露裘之美則曰襦所謂
大裘不襦則非衮而何玉藻曰禮不盛服不充故大裘

不裼則明不裼而襲也充美也鄭氏謂大裘之上有玄衣雖不知覆裘以袞然尚知大裘不可徒服必有玄衣以覆之玉藻有尸襲之義周禮裘冕注云裘冕者從尸服也夫尸服大裘而襲則王服大裘而襲可知且裘不可以徒服故被以袞豈借袞以為飾哉今謂祭天用袞冕為齋服裘冕為祭服此乃襲先儒之謬誤後漢顯宗初服日月星辰十二章以祀天地自魏以來皆用袞服則魏漢祭天嘗服袞矣雖無大裘未能盡合於禮固未

嘗有表裘而祭者也且裘內服也與袍同袍褻矣而欲禪以祭天以明示質是欲袂衣以見上帝也洵直復欲為大裘之裳纁色而無章飾夫表安得有裳哉請從先帝所志其後詔如洵直議去黑羔皮而以黑繒製焉政和議禮局上大裘青表纁裡黑羔皮為領標襪朱裳被以袞服冬至祀昊天上帝服之立冬祀黑帝立冬後祭神州地祇亦如之中興之後無有存者紹興十三年禮部侍郎王賞等言郊祀大禮合依禮經皇帝服大裘被

衮行禮據元豐詳定郊廟禮文何洵直議以黑繒創作
大裘如衮惟領袖用黑羔乞如洵直議詔有司如祖宗
舊制以羔製之禮部又言關西羊羔係天生黑色今有
司涅白羔為之不中禮制不如權以繒代又元祐中有
司欲為大裘度用百羔哲宗以為害物遂用黑繒請依
太常所言從之遂以衮襲裘冕亦十二旒焉

衮冕之制宋初因五代之舊天子之服有衮冕廣一尺
二寸長二尺四寸前後十二旒二纓並貫真珠又有翠

旒十二碧鳳銜之在珠旒外冕版以龍鱗錦表上綴玉
為七星旁施琥珀餅犀餅各二十四周綴金絲網鈿以
真珠雜寶玉加紫雲白鶴錦裏四柱飾以七寶紅綾裏
金飾玉簪導紅絲條組帶亦謂之平天冠袞服青色日
月星山龍雉虎雌七章紅裙藻火粉米黼黻五章紅蔽
膝升龍二並織成間以雲朶飾以金釵花鈿窠裝以真
珠琥珀雜寶玉紅羅襦裙繡五章青標褰裾六采綬一
小綬三結玉環三素大帶朱裏青羅四神帶二繡四神

盤結

綬帶飾並同衮服

白羅中單青羅袂帶紅羅勒帛鹿盧玉

具劔玉鏢首鏤白玉雙佩金飾貫真珠金龍鳳草帶紅
襪赤舄金釵花四神玉鼻祭天地宗廟朝太清宮饗玉
清昭應宮景靈宮受冊尊號元日受朝冊皇太子則服
之太祖建隆元年太常禮院言準少府監牒請具衮龍
衣絳紗袍通天冠制度令式衮冕垂白珠十有二旒以
組為纓色如其綬黼纁克耳玉簪導玄衣纁裳十二章
八章在衣日月星辰山龍華蟲火宗彝四章在裳藻粉

米黼蔽衣標領如上為升龍皆織就為之山龍以下每
章一行重以為等每行十二白紗中單黼領青標襪裙
蔽膝加龍山火三章草帶玉鈎鐔大帶素帶朱裏紕其
外上朱下綠紐約用組鹿盧玉具劔大珠鏤首白玉雙
佩玄組雙大綬六米玄黃赤白縹綠純玄質長二丈四
尺五寸首廣一尺小雙綬長二尺六寸色同大綬而首
半之間施三玉環朱鞞赤舄加金飾詔可二年太子詹
事尹拙工部尚書竇儀議謹按周禮弁師掌王之五冕

朱裏延紐五米纁十有二就皆五米玉十有二玉笄朱
紘諸侯之纁旒九就珉玉三米其餘如王之事纁旒皆
就玉瑱玉笄疏云王不言玉瑱於此言之者王與諸侯
互相見為義是以王言玄冕朱裏延紐及朱紘明諸侯
亦有之諸公言玉瑱明王亦有之詳此經疏之文則是
本有克耳今請令君臣袞冕以下並畫克耳以合正文
從之乾德元年閏十二月少府監楊格少監王處訥等
上新造皇帝冠冕先是郊祀冠冕多飾以珠玉帝以華

而且重故命改製之仁宗景祐二年又以帝后及羣臣
冠服多沿唐舊而循用之久則有司寢為繁文以失法
度詔入內侍省御藥院與太常禮院詳典故造冠冕
蠲減珍華務從簡約俾圖以進續詔通天冠絳紗袍更
不修製由是改製袞冕天版元濶一尺二寸長二尺四
寸今製廣八寸長一尺六寸減翠旒並鳳子前後二十
四珠旒並合典制天板頂上元織成龍鱗錦為表紫雲
白鶴錦為裏今製青羅為表米畫出龍鱗紅羅為裏米

畫出紫雲白鶴所有犀餅琥珀餅各二十四今減不用
金絲結網子上舊有金絲結龍八今減四亦減絲令細
天板四面花墮子素墜子依舊減輕造冠身并天柱元
織成龍鱗錦今用青羅采畫出龍鱗金輪等七寶元真
玉碾成今更不用如補空却以雲龍細窠分旒玉鈎二
今減去之天河帶組帶欸慢帶依舊減輕造納言元用
三製今用青羅采畫出龍鱗錦金稜上稜道依舊用金
卽減輕製甃續玉簪袞服八章日月星辰山龍華蟲火

宗彝青羅身紅羅襪繡造所有雲子相度稀稠補空更不用細窠亦不使真珠裝綴中單依舊皂白製造裙用紅羅繡出藻粉米黼黻周回花樣仍舊減稀製之蔽膝用紅羅繡升龍二雲子補空減稀製之周回依舊細窠不用六米綬依舊減絲織造所有玉環亦減輕帶頭金葉減去用銷金四神帶不用劔佩梁帶鞢舄並依舊嘉祐元年王洙奏天子法服冕旒形度重大華飾稍繁願集禮官參定詔禮院詳典禮上聞而禮院繪圖以進因

敕御藥院更造其後冕服稍增多如故英宗治平二年
知太常禮院李育奏曰郊廟之祭本尚純質袞冕之飾
皆存法象非事繁多重竒玩也冕則以周官為本凡十
二旒間以采玉加以紘紕笄瑱之飾袞則以虞書為始
凡十二章首以辰象別以衣裳繪繡之采東漢至唐史
官名儒記述前制皆無珠翠犀寶之飾何則鴈羽螭胎
非法服所用琥珀犀鉞非至尊所冠龍錦七星已列采
章之內紫雲白鶴近出道家之語豈被袞戴璫象天則

數之義哉自大裘之廢顓用衮冕古朴稍去而法度尚存夫明水大羹不可以衆味和雲門咸池不可以新聲間衮冕之服不可以珍怪累也若魏明之用珊瑚江右之用翡翠侈靡衰播之餘豈足為聖朝道哉且太祖建隆元年少府監所造冕服及二年博士聶崇義所進三禮圖嘗詔尹拙竇儀參校之皆倣虞周漢唐之舊至四年冬服之合祭天地於圜丘用此制也太宗亦嘗命少府製於禁中不聞改作及真宗封太山禮官請服衮冕

帝曰前王服羔裘尚質也今則無羔裘而有袞冕可從
近制是豈有意於繁飾哉蓋後之有司率意妄增未嘗
確議遂相循而用故仁宗嘗詔禮官章得象等詳議之
其所減過半然不經之飾重者多去輕者尚存不能盡
如詔書之意故至和三年王洙復議去繁飾禮官畫圖
以獻漸還古禮而有司所造復如景祐之前又按開寶
通禮及衣服令冕服皆有定法悉無寶錦之飾夫太祖
太宗富有四海豈乏寶玩顧不可施之郊廟也臣竊謂

陛下肇祀天地躬饗祖禰服周之冕觀古之象願復先王之制祖宗之法其衮冕之服及鞞綬佩舄之類與通禮衣服令三禮圖制度不同者宜悉改正詔太常禮院少府參定遂合奏曰古者冕服之用郊廟殊制唐典天子之服有二等而大裘尚存顯慶初長孫無忌等米郊特牲之說獻議廢大裘自是郊廟之祭一用衮冕然旒章之數止以十二為節亦未聞有餘飾也國朝冕服雖倣古制然增以珍異巧縟前世所未嘗有夫國之大事

莫大於祀而祭服違經非以肅祀容尊神明也臣等以謂宜如育言參酌通禮衣服令三禮圖及景祐三年減定之制一切改造之孔子曰麻冕禮也今也純儉吾從衆純者絲也變麻用絲蓋已久矣則冕服之制宜依舊以羅為之冕廣一尺二寸長二尺二寸約以景表尺前圓後方黝上朱下以金飾版則以白玉珠為旒貫之以五采絲繩前後各十二旒旒各十二珠相去一寸長二尺朱絲組為纓黹纁克耳金飾玉簪導青衣纁裳十二

章八章繪之於衣日月星辰山龍華蟲火宗彝也四章繡之於裳藻粉米黼黻也錦龍標領織為升龍山龍而下一章為一行重以為等行十二別製大帶素表朱裏朱綠終辟韞紱大小綬亦去珠玉鈿窠琥珀玻瓈之飾其中單草帶玉具劔玉佩朱韞之制已中禮今無復改為則法服有稽祭禮增重復詔禮院再詳以聞而內侍省奏謂景祐中已裁定可因而用也從之神宗元豐元年詳定郊廟禮文所言凡冕版廣八寸長尺六寸與

古制相合更不復議今取少府監進樣如以青羅為表紅羅為裏則非弁師所謂玄冕朱裏者也上用金稜天版四周金綵結網兩旁用真珠花素隆之類皆不應禮伏請改用朱組為紃玉笄玉瑱以玄紃垂瑱以五采玉貫於五色藻為旒以青赤黃白黑五色備為一玉每一玉長一寸前後二十四旒垂而齊肩以合孔子所謂純儉之義又古者祭服朝服之裳皆前三幅後四幅前為陽以象奇後為陰以象偶惟深衣中禪之屬連衣裳而

裳復不殊前後然以六幅交解為十二幅象十二月其
制作莫不有法故謂之法服今少府監袞服其裳乃以
八幅為之不殊前後有違古義伏請改正祭服之裳以
七幅為之殊其前後以今太常周尺度之幅廣二尺二
寸每幅兩旁各縫殺一寸謂之削幅腰間辟積無數裳
側有純謂之緦裳下有純謂之絳緦絳之廣各寸半表
裏合為三寸羣臣祭服之裳倣此從之政和議禮局更
上皇帝冕服之制冕版廣八寸長一尺六寸前高八寸

五分後高九寸五分青表朱裏前後各十有二旒五采藻十有二就就間相去一寸青碧錦織成天河帶長一丈二尺廣二寸朱絲組帶為纓黹纁克耳金飾玉簪導長一尺二寸袞服青衣八章繪日月星辰山龍華蟲火宗彛纁裳四章繡藻粉米黼黻蔽膝隨裳色繡升龍二白羅中單皂褕襖紅羅勒帛青羅袜帶緋白羅大帶草帶白玉雙佩大綬六采赤黃黑白縹綠小綬三色如大綬間施玉環三朱鞮赤舄緣以黃羅中興仍舊制延以

羅衣木玄表朱裏長尺有六寸前低一寸二分四旁緣以金覆於卷武之上繅以五色絲貫五色玉前後各十二凡用二百八十有八玉笄充耳用黃綿紘以朱組以其一屬於左笄上垂下又屈而屬於右笄繫之而垂其餘衣玄八章升龍於山繪裳纁四章繡幅前三後四斷而不屬兩旁殺緹腰襃積紕紕之廣皆如舊大帶以緋白羅合而紩之以朱綠飾其側上朱下綠其束處以組為紐約下垂三尺通天冠絳紗袍亦如之白羅中單領

標襖以黻服裘則以皂絳紗袍則衣用白紗領標襖以朱綬大小各一大綬織以六采青黃黑白縹綠下垂青綵網上有結垂玉環三小綬制如大綬惟三色大裘絳紗袍皆用之草帶博二寸草為裏緋羅為表飾以玉鈎鉏以玉鉤鑿通天冠絳紗袍亦用之黻從裳色上有紕下有純去上五寸繪以山龍火上接草帶繫之佩有衡有琚瑀有衝牙繫於草帶左右各一上設衡衡下垂三帶貫以蠙珠次則中有金獸面兩旁夾以雙璜又次設

琚瑀下則衝牙居中央兩旁有玉滴子行則擊牙而有聲舄有絢有純有纁有綦以緋羅為之首加金飾服通天冠絳紗袍則用黑舄以烏皮為之常服則用白舄以絲為之韞羅表繪裏施勒著綦以繫之亦舄以采黑舄以白白舄同

通天冠二十四梁加金博山附蟬十二高廣各一尺青表朱裏首施珠翠黑介幘組纓翠綏玉犀簪導絳紗袍以織成雲龍紅金條紗為之紅裏皂褾襪絀絳紗裙蔽

膝如袍飾並皂褙襪白紗中單朱領褙襪裙白羅方心
曲領白襪黑舄佩綬如袞大祭祀致齋正旦冬至五月
朔大朝會大冊命親耕籍田皆服之仁宗天聖二年南
郊禮儀使李維言通天冠上一字準敕迴避詔改承天
冠中興之制冠高九寸服用並同乾道九年又用履袍
袍以絳羅為之折上巾通犀金玉帶繫履則曰履袍服
鞞則曰鞞袍履鞞皆用黑革四孟朝獻景靈宮郊祀明
堂詣宮宿廟進胙上壽兩宮及端門肆赦並服之大禮

畢還宮乘平輦服亦如之若乘大輦則服通天絳紗如常儀

衫袍唐因隋制天子常服赤黃淺黃袍衫折上巾九還帶六合鞞宋因之有赭黃淡黃袍衫玉裝紅束帶皂文鞞大宴則服之又有赭黃淡黃襖袍紅衫袍常朝則服之又有窄袍便坐視事則服之皆皂紗折上巾通犀金玉環帶窄袍或御烏紗帽中興仍之初高宗踐阼於南都隆祐太后命內臣上乘輿服御有小冠太后曰祖宗

間居之所服也自神宗始易以巾願即位後退朝上戴此冠庶幾如祖宗時氣象後殿早講皇帝服帽子紅袍玉束帶講讀官公服繫鞵晚講皇帝服頭巾背子講官易便服此嘉定四年講筵之制也

御閱服以金裝甲乘馬大閱則服之

圭宋初凡大祭祀大朝會天子皆執圭元豐二年詳定儀注所言周禮王執鎮圭釋者曰祭天地宗廟及朝日夕月則執之若朝覲諸侯授玉於王王授玉撫玉而已

考工記天子執冒四寸以朝諸侯蓋天子以冒圭邪刻之處冒諸侯之圭以齊瑞信也未有臨臣子而執鎮圭者唐六典殿中監掌服御之事凡大祭祀則搢大圭執鎮圭若大朝會止進爵開寶通禮始著元會執圭出自西房淳化中上壽進酒又令內侍奉圭於周制唐禮皆不合其元會受朝賀請不執鎮圭上壽詔可三年詔議大圭尺度詳定所言考工記鎮圭尺有二寸天子守之大圭長三尺杼上終葵首天子服之後魏以降以白玉

為之長尺有二寸西魏以來皆然方而不折雖非古制
蓋後世以所得之玉隨宜為之今請揆玉之有無制之
又言唐禮親祀天地神祇皆搯大圭執鎮圭有事宗廟
則執鎮圭而已王涇郊祀錄曰大圭質也事天地之禮
質故質而搯之鎮圭文也宗廟之禮亦文故無兼執之
義不知大圭天子之笏也通於郊廟請自今皇帝親祠
郊廟搯大圭執鎮圭奉祀之時既接神再拜則奠鎮圭
為摯大圭為笏又言開元及開寶通禮皇帝升輅不言

執圭祀日質明至中壝門外殿中監進大圭尚衣奉御
又以鎮圭授殿中監以進於是始搢大圭執鎮圭今皇
帝乘玉輅執鎮圭赴景靈宮及太廟青城皆乘輅執圭
殊不應禮請自今乘輅不執圭還內御大輦亦如之詳
定所又言大圭中必之制請製薦玉繅藉以木為榦廣
袤如玉以韋衣之常上畫五采文前後垂之又製約圭
繅藉長尺上玄下絳為地五采五就因以為飾每奠圭
則以薦玉之繅陳於地執圭則以約圭之繅偁失墜因

垂之為飾況大圭搢之紳帶之間不可無中必明矣俟
明堂服大圭宜依鎮圭所約之組令可繫之哲宗元祐
元年禮部言元豐新禮皇帝祀天搢大圭其制圓首前
詘於禮未合今欲放西魏隋唐玉笏之制方而不折上
下皆博三寸長尺二寸其厚以鎮圭為約從之政和二
年宦者譚稹獻玄圭其制兩旁刻十三山若古山尊上
銳下方上有雷雨之文下無瑑節外黑內赤中一小好
可容指其長尺有二寸詔付廷議議官以為周玉執鎮

圭緣飾以四鎮之山其中有好為受組之地其長尺有二寸周人倣古為之而王執以鎮四方也徽宗乃以是歲冬御大慶殿受圭焉三年又詔曰先王以類而求祀圜丘以象形蒼玉以象色冬日以至取其時大裘而冕法其幽而未有以體其道天玄而地黃今大圭內赤外黑于以體之冬祀可搢大圭執玄圭永為定制中興仍舊制大祭祀則執大圭以為笏上太上皇皇太后冊寶亦如之

皇太子之服一曰袞冕二曰遠游冠朱明衣三曰常服
袞冕青羅表緋羅紅綾裏塗金銀釵花飾犀簪導紅綵
組前後白珠九旒二纁貫水晶珠青羅衣繡山龍雉火
虎雌五章紅羅裳繡藻粉米黼黻四章紅羅蔽膝繡山
火二章白紗中單青標襪裾草帶塗金銀鉤鰓瑜玉雙
佩四采織成大綬結二玉環金塗銀級花飾青羅袜帶
紅羅勒帛玉具釵金塗銀釵花玉鏢首白羅鞵朱履金
塗銀釵從祀則服之遠游冠十八梁青羅表金塗銀釵

花飾犀簪導紅絲組為纓博山政和加附蟬朱明服紅
花金條紗衣紅紗裏皂標襪紅紗裳紅紗蔽膝並紅紗
裏白花羅中單皂標襪白羅方心曲領羅鞞黑舄草帶
劍佩綬餘同袞服祿帶勒帛執桓圭受冊謁廟朝會則
服之常服皂紗折上巾紫公服通犀金玉帶太宗至道
元年太常禮院言南郊皇太子充亞獻合著祭祀服準
制度袞冕以組為纓色如其綬青纁克耳玄衣纁裳凡
九章每章一行重以為等皆織為之白紗中單黻領青

標襪裾草帶金鉤釧大帶素帶不朱裏亦紕以朱綠紐
約用組黻隨裳色二章朱組雙大綬四章赤白標襪純
朱質長一丈八尺三百二十首廣九寸小雙綬長二尺
六寸色同大綬而首半之間施二玉環朱鞮赤舄加
金飾餘同舊制侍從祭祀及謁廟加元服納妃則服之
詔依止製造政和議禮局更上皇太子服制袞冕惟青
纁充耳餘並同國初之制加元服從祀納妃釋奠文宣
王服之中興並同其皇子之服紹興三十二年十月禮

官言皇子鄧慶恭三王過行事服朝服則七梁額花冠
貂蟬籠巾金塗銀立筆真玉佩綬金塗銀草帶烏皮履
若服祭服則金塗銀八旒冕真玉佩綬緋羅履韞詔文
思院製造

后妃之服一曰褱衣二曰朱衣三曰禮衣四曰鞠衣妃
之綠由翟為章三等大帶隨衣色朱裏紕其外上以朱
錦下以綠錦紐約用青組草帶以青衣之白玉雙佩黑
組雙大綬小綬三間施玉環三青韞烏舄加金飾受冊

朝謁景靈宮服之鞠衣黃羅為之蔽膝大帶草舄隨衣
色餘同禕衣唯無翟文親蠶服之妃首飾花九株小花
同并兩博鬢冠飾以九翬四鳳褕翟青羅繡為搖翟之
形編次於衣青質五色九等素紗中單黼領羅縠標襪
蔽膝隨裳色以緇為領緣以搖翟為章二等大帶隨衣
色不朱裏紕其外餘倣皇后冠服之制受冊服之

皇太子妃首飾花九株小花同并兩博鬢褕翟青織為
搖翟之形青質五色九等素紗中單黼領羅縠標襪皆

以朱色蔽膝隨裳色以緇為領緣以搖翟為章二等大帶隨衣色不朱裏紕其外上以朱錦下以綠錦紐約用青組草帶以青衣之白玉雙佩純朱雙大綬章米尺寸與皇太子同受冊朝會服之鞠衣黃羅為之蔽膝大帶草帶隨衣色餘與禴翟同唯無翟從蠶服之中興仍舊制其龍鳳花釵冠大小花二十四株應乘輿冠梁之數博鬢冠飾同皇太后皇后服之紹興九年所定也花釵冠小大花十八株應皇太子冠梁之數施兩博鬢去龍

鳳皇太子妃服之乾道七年所定也其服后惟備褱衣
禮衣妃備褱翟凡三等其當服后妃大袖生色領長裙
霞帔玉墜子背子生色領皆用絳羅蓋與臣下不異

命婦服政和議禮局上花釵冠皆施兩博鬢寶鈿飾翟
衣青羅繡為翟編次於衣及裳第一品花釵九株寶鈿
準花數翟九等第二品花釵八株翟八等第三品花釵
七株翟七等第四品花釵六株翟六等第五品花釵五
株翟五等並素紗中單黼領朱標襖通用羅縠蔽膝隨

裳色以緞為領緣加文繡重雉為章二等

二品以下準此大帶

草帶青鞵舄佩綬受冊從蠶服之七年臣僚言今文臣九品殊以三品之服至於命婦已釐八等之號而服制未有名稱詔有司視其夫之品秩而定其服飾詔送禮制局定之其儀闕焉

宋史卷一百五十一